

INDIA RAM PRESBYTERIAN KOHHRAN



DÂN BU

*Published
for
The Mizoram Presbyterian Church Synod
by
The Synod Literature & Publication Board*

*Seventh Revised Edition (English) - 2004
Seventh Revised Edition (Mizo) - 2005*

*Copies - 8000
All Rights (Mizo) Reserved ©*

*Printed
at
The Synod Press
Aizawl – 796 001
Mizoram*

A CHHÛNGA THU AWMTE

Thuhma	<i>Phek</i> xi
Chanchin Tlangpui	xiii

THEN - I KOHHRAN THURIN

Thuhmahruai	1
Thurinte	1-4

THEN - II DANPUI (CONSTITUTION)

BUNG I KOHHRAN

1. Kohhran :	5
<i>a. Hmuh theih loh Kohhran</i>	5
<i>b. Hmuh theih Kohhran</i>	6
2. Presbyterian Kohhran	6
3. India ram Presbyterian Kohhran	6
4. Kohhran Inkhawm	7
5. Pathian Biak – A thu zir leh Inpāwlkhāwmna	7
6. Puipate :	7
<i>a. Upate</i>	7
<i>b. Probationary Pastor-te</i>	8
<i>c. Minister-te</i>	8

7. Kohhran Rorźlnate	8
<i>a. Tualchhũng Kohhran</i>	8
<i>b. Bial</i>	8
<i>c. Presbytery</i>	9
<i>d. Synod</i>	9
<i>e. General Assembly</i>	9

BUNG II TUALCHHŨNG KOHHRAN

1. Member nih dān	10
<i>a. Member nih dān sawifiahna</i>	10
i) Dān zawhkimte	
ii) Baptisma chang member-te	
iii) Member dange	
<i>b. Baptisma</i>	10
i) Baptisma chang theite	
ii) Baptisma chan nawn khap	
iii) Nu leh pate tih tūr	
<i>c. Lawmluhna</i>	11
i) Dān zawhkim atāna pawmna	
ii) Kohhran tih tūr	
<i>d. Pźm</i>	11
2. Inrźlbāwlā lam	11
<i>a. Kohhran indin dān</i>	11
i) Preaching Station	
ii) Branch Church	
iii) Tualchhũng Kohhran	
<i>b. Kohhran Committee din dān</i>	
<i>leh Puipate ruat dān</i>	13

- c. Kohhran Committee tih tûrte* 13
- i) Kohhran enkawlna leh rorêlna lam
 - ii) Lalpa Zanriah
 - iii) Kohhran hming ziaakna
 - iv) Kohhran hnêna hriattîr tûr
 - v) Kohhran chhûnga thubuai
 - vi) Puipa nghet awm lohnaa Kohhranin dân a kalpui dân
- d. Dân zawhkim lote* 14

BUNG III INTHUNUNNA

1. A awmzia leh a tum 15
- a. Thunun dân hrang hrangte* 15
- i) Zilh
 - ii) Kohhran chanvo pawimawh atanga chawlhîr
 - iii) Hnawh chhuah
- b. Puipate chawlhîr dân* 16
- c. Dân bawhchhia thununnate* 16
- i) Inngaihna suala tlute
 - ii) Dân bawhchhiatna dangte
- d. Member-a lâk luh lehte dinhmun* 16
2. Thil chin thenkhat chungchânga inkaihhruaina 17
- a. Kohhran mite inthliar fihlimna tûr* 17
- i) Milem biak
 - ii) Ruih theih thil, etc
 - iii) Pawisa khelh, etc
- b. Inneihna Thianghlim sâwngbâwl dân* 17
- c. Inthenna thu* 17

BUNG IV
SUM LEH THIL NEIH DANGTE

- | | | |
|----|--|----|
| 1. | a. <i>Thilpêk thu</i> | 18 |
| | b. <i>Bungraw lam thilpêk</i> | 18 |
| | c. <i>Bial leh Synod hminga enkawl dân</i> | 18 |
| | d. <i>Biak In sak</i> | 18 |

BUNG V
KOHHRAN RORÊLNA DANGTE SIAM DÂN LEH
AN TIH TÛRTE

- | | | |
|----|--|----|
| 1. | Bial | 19 |
| | a. <i>Bial siam dân</i> | 19 |
| | b. <i>Bial Inkhâwmpui member-te</i> | 19 |
| | c. <i>A thawh tûr chin leh tih tûrte</i> | 20 |
| | d. <i>Puipate thlan dân</i> | 20 |
| | e. <i>Bial Committee-te</i> | 20 |
| | i) Standing Committee | |
| | ii) Nomination Committee | |
| | iii) Committee dangte | |
| | f. <i>Rorêl ziaakna bu</i> | 21 |
| 2. | Presbytery | 21 |
| | a. <i>Presbytery siam dân</i> | 21 |
| | b. <i>Presbytery member-te</i> | 21 |
| | c. <i>Palai tîrh dân</i> | 22 |
| | d. <i>Inkhâwmpui neih zin dân</i> | 22 |
| | e. <i>Puipate thlan dân</i> | 22 |
| | f. <i>Synod-a thu thlen dân</i> | 23 |
| | g. <i>A thawh tûr chin leh tih tûrte</i> | 23 |
| | h. <i>Telna insawn</i> | 24 |
| | i. <i>Report</i> | 24 |

<i>j. Thlarau lam thupui</i>	24
<i>k. Committee hrang hrangte</i>	24
i) Standing Committee	
ii) Nomination Committee	
iii) Sub-Pastoral Committee	
iv) Finance Committee	
<i>l. Finance Officer(s)/Treasurer</i>	26
<i>m. Thil neih enkawltute</i>	26
<i>n. Sum endiktute</i>	26
<i>o. Synod-a palai tìrh dân</i>	26
<i>p. Rorêl zìakna bu</i>	26
3. Synod	27
<i>a. Synod siam dân</i>	27
<i>b. Synod Inkhâwmpuia tel tûrte</i>	27
<i>c. Synod chhìmtute</i>	27
<i>d. Palai intìrh dân</i>	27
<i>e. Puipate thlan dân</i>	28
<i>f. Inkhâwmpui neih zìn dân</i>	28
<i>g. Synod tìh tûrte</i>	28
<i>h. Hmìng lam leh thuchah hnùhnung</i>	29
<i>i. Thurêlte hriattirna</i>	29
<i>j. Committee hrangte</i>	30
i) Executive Committee	
ii) Nomination Committee	
iii) Pastoral Committee	
iv) Theological Education Committee	
v) Finance Committee	
vi) Mission and Evangelism Committee	
vii) Trust Committee	
viii) Committee dangte	
<i>k. Sum endikna</i>	35

<i>l. Hmeichhia leh thalaite rawngbâwna</i>	35
<i>m. Sunday School Exam</i>	35
<i>n. Thlarau lam thupui</i>	36
4. Regional Assembly	36
5. General Assembly	36
<i>a. General Assembly Inkhâwmpui member</i>	36
<i>b. Palai tîrh dân</i>	37
<i>c. Inkhâwmpui neih zin dân</i>	37
<i>d. Puipate thlan dân</i>	37
<i>e. General Assembly Committee-te</i>	37
i) Nomination Committee	
ii) Executive Committee	
iii) Theological Education Committee	
iv) Mission and Evangelism Committee	
v) Christian Communication Committee	
vi) General Assembly tih tûrte	
vii) General Assembly thurêl minute	
viii) Thlarau lam thupui leh Lalpa Zanriah	
ix) Kohhran danga palaina	

BUNG VI

KOHHRAN PUIPATE THLAN DÂN LEH NEMNGHEH DÂN

1. Upate	46
<i>a. Inthlanna</i>	46
<i>b. Thlang thei tûr Dân zawhkim zât</i>	46
<i>c. Tlin theihna vote tûl zât</i>	46
<i>d. Upa atâna thlan theih lohte</i>	47
<i>e. Presbytery-a hming pêk luh</i>	47
<i>f. Upa atâna tling</i>	47

g.	<i>Nemngheh dân</i>	47
h.	<i>Upa pêm chungchâng</i>	48
i.	<i>Nemngheh nawn tûl lo</i>	48
j.	<i>Pêm lehkhâ</i>	49
k.	<i>Kohhran Upa pêm lêt lehte dinhmun</i>	49
2.	Probationary Pastor-te	49
a.	<i>Zir tûra ruat zir zo</i>	49
b.	<i>A hnathawh tûrte</i>	49
c.	<i>Ruat dân</i>	49
d.	<i>Dahnghehna</i>	50
e.	<i>Enchhin hun chhûng</i>	50
	i) <i>A zira zir tûr</i>	
	ii) <i>A thawha thawh tûr</i>	
f.	<i>Pastor puitlinga siam dân</i>	51
g.	<i>Insawntîr dân</i>	51
h.	<i>Chawlh lailâwktîr dân</i>	51
3.	Minister leh Pastor-te	52
a.	<i>An mawphurhna leh tih tûrte</i>	52
b.	<i>Minister atâna nemnghehna</i>	52
c.	<i>Nemngheh dân tûr</i>	53
d.	<i>Pastor thawhna hmun ruat dân</i>	54
e.	<i>Bântîr dân</i>	55
4.	Dinhmun ngaia dah leh theih loh	55

BUNG VII

1.	Kalphung tângpui	56
2.	Dânpuì tihdanglam dân	56
3.	Dânpuì hrilhfiah chungchâng	56

DAN TÊ (BYE-LAWS)

1. Administrative Secretary-te	57
<i>a. An thawh hun chhûng</i>	57
<i>b. Ruat dân</i>	57
<i>c. Ruat nawn dân</i>	58
<i>d. Administrative Secretary-te</i>	
<i>hna thawh dân kalhmang</i>	59
<i>e. Administrative Secretary-te</i>	
<i>hna thawh dân tûr</i>	59
<i>f. Sum lam changtu</i>	
<i>Administrative Secretary tih tûr</i>	59
<i>g. Treasurer hna</i>	60
<i>h. Bank-a hming ziaktu tûrte</i>	60
2. General Assembly Working Committee	60
3. Synod Executive Secretary-te	61

THEN - I**KOHHRAN THURIN****THUHMAHRUAI**

India Ram Presbyterian Kohhran chuan (Apostol thurin te, Nicea thurin te, Westminster thurin leh Wales Ram Presbyterian Kohhran thurinte chu Pathian thu hrilhfhahna tha tâwka ngai a, Kohhran tân leh Pathian thu zirna hmunahte zirtir tlâk nia pawm tlat chungin), a hnuaia thurin puanchhuahna thute hi a Pastor te, Probationary Pastor te, Upate leh Kohhrana Dân zawhkimten an vawn ngheh tlat atân a pawm a ni.

THURIN I

Thuthlung Hlui leh Thuthlung Thar Bute hi Pathian Thu a ni a, hêng chauh hi rinna leh thiltih tehna dik lo thei lo a ni.

THURIN II

Pathian pakhat chauh a awm a, Amah chauh chu biak tur a ni. Amah chu Thlarau, mahnia awm a, hmun tina awm, thlarau dang zawng zawng leh thil dang rêng rêng laka hrang si a ni a. A miziaah te, finnaah te, thiltihtheihnaah te, thianghlimnaah te, diknaah te, thatnaah te, taknaah te leh hmangaihnaah te tâwp chin nei lo, chatuan mi, danglam ngai lo a ni.

THURIN III

Pathianah chuan mi nung pathum, Pa leh Fapa leh Thlarau Thianghlim an awm a, an pathum hian Pathian pakhat an ni a, nihna thuhmun, thiltihtheihna leh ropuinaa intluk an ni.

THURIN IV

Lei leh vân leh a chhûnga thil awm zawng zawng siamtu Pathian chuan mihring hi, hriatna, felna leh thianghlimnaa Ama anpuin mipaah leh hmeichhiaah a siam a. Mi zawng zawng hi bul thuhmun leh chhûngkaw khata unau anga inthui khâwm vek kan ni.

THURIN V

Mihring chuan anmahni duhthu ngeiin Pathian dân an bawhchhia a, thiam lohna leh chhiatnaah chuan anmahni an inbarh lût ta a. Chu thiam lohna leh chhiatna leh سوال hremna ata chu anmahni chhan chhuak tur leh chatuan nunna pe turin hmangaihna tâwp nei lo Pathian chuan, A chatuan Fapa neih chhun Lal Isua Krista chu khawvêlah a rawn tîr a; Ama zârah chauh chuan mihringte hi chhandamin an awm thei a. Chu chatuan Fapa chu mihring takah a lo chang a, mi nung pakhat mize pahnihi nei, Pathian tak leh mihring tak a ni kumkhua ta a ni. Thlarau Thianghlim thiltihtheihnain nula thianghlim Mari chuan a pai a, a hring a; mahse, سوال a nei lo. Mi sualte tân Pathian dân chu a zâwm famkim a, Pathianin dikna a phût hlen chhuak tur leh mihringte Pathian remtir turin, inthawina tak leh famkim atân a inhlân a, kraws-ah a thi a, phûmin a awm a, ni thum niah mitthi zing ata a tho leh a. Pathian ding lamah a han chho va, chutah chuan a mite tân a dilsak reng a, chuta tang chuan mitthite kai tho tur leh khawvêl rorêl turin a lo kal leh ang.

THURIN VI

Thlarau Thianghlim, Pa leh Fapa ata lo chhuak chuan mihringte chu chhandamna changtuah a siam a, an sualzia leh chungpikziate a hriat chiantir a. Krista hriatna kawngah an rilru a tivâr a, an duhthlannate chawk thovin, Isua Krista chu an Lalpa leh chhandamtua pawm tura ngênin, pawm thei turin a pui a, anmahniah felna rah chi tinrêng a thawk chhuak thin.

THURIN VII

Pathianin Kristaah chuan mi zawng zawng hnênah chhandamna famkim chu a thlâwnin a rawn hlân a, an sualte sim tur leh Lal Isua Krista chu an chhandamtu atâna ring tur te, Amah entwawn a, Pathian duh ang taka inngaitlâwm leh thianghlima nung tur tein thu a pe a. Krista chu ringa a thu zâwmtute chu chhandam an ni a, sual ngaihdamna te, thiam chantirna te, Pathian fa nihna te, Thlarau Thianghlim chênpuina azâra tihthianghlimna te, chatuan ropuina te an chang a. Ringtute chuan tân dam chhûng pawhin chhandam nih inhriat chianna lâwmawm tak chu an chang thei a. Thlarau Thianghlim chuan khawngaihna hna a thawhin, Thu te, Sakramen te, Tawngtaina te hi hmanruaah a hman deuh bik thin a ni.

THURIN VIII

Krista din chhuah Sakramen-te chu Baptisma leh Lalpa Zanriah te hi an ni. Baptisma chu Pa leh Fapa leh Thlarau Thianghlim hminga tuia sil a ni. Hei hi Krista nêna kan inzawmna te, Thlarau Thianghlim zâra piantharna leh tihnunna chhinchhiahna leh nemnghehna a ni a, Lalpa hnêna kan inhlanna thiltih a ni baw. An sualte sim a, Krista chu an chhandamtu atân an ring tih puangtute leh an fate chantir tur a ni.

Lalpa Zanriah chu Krista thihna hriat reng nâna chhang leh uain chan ho hi a ni a, ringtuten Krista thihnaa hlâwkna an chan chhinchhiahna leh nemnghehna a ni. Ama mite chuan Amah leh a inhlanna an pawmzia te, an hlâwkpuizia te, a rawngbâwl tura an inpêk zêlna te, Amah an pâwlina leh mi dang nêna an inpâwlina te entir nân, A lo kal leh hma loh chuan an chang ho thin tur a ni. Sakramen hlâwkna te chu Krista malsâwmna avâng leh rinnaa changtuah Thlaraubin a thawh avânga lo awm a ni.

THURIN IX

Ringtu zawng zawng tih tur chu Kohhran inpâwl honaa tel te, Krista Sakramen leh a thil serh dang vawn that te, A dân zawm te, tawngtai zêl te, Lalpa Ni serh thianghlim te, Amah be ho tura inkhâwm te, A thu hril ngun taka ngaihthlâk te, Pathian malsâwmna an dawn ang zêla hlim taka pêk ve thung te, anmahniho zingah leh mi zawng zawng zingah Krista nungchang ang tihlan te, khawvêl puma Krista ram tizau tura beih te, ropui taka a lo kal lehna hun nghah te hi a ni.

THURIN X

Ni hnunngah chuan mitthite chu kaihthawhin an awm ang a, mi zawng zawng Krista rorêlna thutphah hmaah an lang ang a, he dam chhûnga an thiltih that leh that loh ang zêlin rêlsak an ni ang. Ringlote leh mi sualte chuan thiam loh changin an sual hremna an tuar ang; Krista ring a, a thu zâwmtute erawh chu a langchanga thiam chantirin an awm ang a, ropuinaa lawm luhin an awm ang.

THEN - II**DANPUI (CONSTITUTION)****BUNG I****KOHHHRAN****1. KOHHHRAN**

Kohhran chu Pathian pakhata mi nung pathum awm ringtu, Isua Krista avânga Chhandamna changtute inpâwl khâwm hi a ni. Pâwl thianghlim a ni a, khawvêl nun sual laka inthiarfihlim a, nun leh rawngbâwlnaah Pathian chu a laipui bera dah tlat tura koh chhuah a ni. Khawvêl huap a nih avângin ringtu hmuh theih leh hmuh theih loh, hmâna mi leh tâna mi, khawvêl hmun tina Kristiante a huap a, hnam leh vun rawng, hmeichhia leh mipa emaw, retheih leh hausak emaw avânga tu mah then hrang leh thliar hrang ngai lo a ni. Pathian lehkha thu rinchhana ding a ni a, a rinna leh thiltih pawh Bible-a innghat tlat a ni. Tirhkohte zirtirnaa innghat a ni a, Kristan a Chanchin Tha khawvêla puang tur leh a thuhretu atâna a tirh chhuah a nih ang takin a thawk thin. Hei hi Pathian nung Kohhran, Krista Taksa, Thlarau Thianghlim In, ram tina englai pawha mi thianghlimte awm khâwmna a ni.

a. Hmuh theih loh Kohhran

Kohhran hmuh theih loh chu ringtu dik, hmâna mi leh tâna mi leh nakina lo la awm tur zawng zawng te, Krista hnuaia pumkhata hruai khâwmte an ni a, Krista chu a lô niin, Krista mo, a taksa, thil tinrêng tifamkimtu famkimna a ni. Thlarau Thianghlimin a tihthianghlim,

Kristan a ropuinaa Kohhran hmêlhem lo, ropui leh hnehtu nia a hlan tur chu a ni.

b. Hmuh theih Kohhran

Huapzo Kohhran hmuh theih chu Kristian thurin pawm, ringtute leh an fate awmna Kohhran chu a ni. He hmuh theih Kohhranah hian Pathian thu puan chhuah a niin, Lalpa Sakramen uluk taka buatsaih a ni a, Dân leh Inthununna te vawn leh kenkawh tlat a ni.

2. PRESBYTERIAN KOHHRAN

Presbyterian Kohhran chu khawvêla Kohhran kalphung chi khat, a tobul leh Pathian thu kalpui dânah Kohhran Siamthat hun lai thil tih dână inngat a ni a; chu chuan Pathian biak dânah te, thianghlim taka nun dânah te leh Krista ram tihzauh kawngah te Presbyterian Kohhran inrêlbâwl dân a rawn hring chhuak a ni.

3. INDIA RAM PRESBYTERIAN KOHHRAN

India Ram Presbyterian Kohhran chu Welsh Calvinistic Methodist Kohhran missionary-ten kum 1841-a Khasi rama rawng an bâwl atanga lo intan a ni. He Kohhran hian Methodist leh Presbyterian inrêlbâwl dân a la kawp a. A tir atang rêngin Chanchin Tha hril kawnga thahnemngaihna leh mipui vântlâng rawngbâwlă siamsak hi a ze ken bîk a ni. Hei vâng hian mahni intodelh, mahnia ro inrêl leh mahni ngeia Chanchin Tha hril thin a nih phah a ni.

4. KOHHRAN INKHAWM

Kohhran Inkhâwm chu hmun ruat bîka Pathian be tur leh Kristian nuna inchâwm tura kâr tin hunbi fel tak neia Kohhran mite kal khâwm thin hi a ni.

5. PATHIAN BIAK, A THU ZIR LEH INPAWLKHAWMNA

Lalpa Niah chuan a mite zawng zawng chu Pathian be turin an inkhâwm thin tur a ni. Pathian biaknaa tih tur langsâr zualte chu fakna hla sak te, tawngtai te, sual puan te, sual ngaihdamna thu puan te, lâwmthu sawi tawngtaina te, tawngtaisakna leh thil dil tawngtaina te, Pathian thu chhiar leh hril te, Sakramen buatsaih te, thil hlan te leh Malsâwmna sawi te a ni. Sakramente chu Baptisma leh Lalpa Zanriah te hi an ni a, Minister-in a buatsaih tur a ni.

Ringtu zawng zawngte chu Lalpa Nia Pathian thu zir tur te, chawlhkâr chhûnga tawngtai inkhâwma tawngtai tur te leh Kohhran inkhâwma Kristian inpâwnnaa tel thin tura beisei an ni.

6. PUIPATE

Kohhran puipa nghette chu Minister te, Probationary Pastor te leh Upate an ni.

a. Upate

Upate chu Kohhranin an aiawha hotu âtâna an thlan, Kohhran thlarau lam nunah te, rorêlna lamah te, rethei enkawlah te leh Kohhran sum rêlbâwl kawngah te Pastor tanpui tura nemnggehna hmanga serh hrante an ni.

b. Probationary Pastor-te

Probationary Pastor-te chu rawngbâwl hna puitlinga nemnggeh an nih hmaa Minister kaihhruaina hnuaia Pastor lam hna thawk tura en chhin âtâna lâkte an ni.

c. Minister-te

Minister-te chu Kohhran Puipa, Krista Chanchin Tha hril tur leh Sakramen buatsaih tura dân ang taka nemngheha serh hrante an ni.

Pastor-te chu Minister zinga mi, Kohhran pakhat emaw, a aia tam emaw thlarau lam thila enkawl leh châwm tura ruatte chu an ni.

7. KOHHRAN RORELNATE

India Ram Presbyterian Kohhran chuan hêng Kohhran rorêlna te–Tualchhông, Bial, Presbytery, Synod leh General Assembly hmang hian amah a inenkawl thin. Hêng Kohhran rorêlna hlâwm hrangte hian a tûl anga Committee-te din theihna an nei theuh a ni.

a. Tualchhông Kohhran

Tualchhông Kohhran chu Presbyterian kal phung zuitu, tualkhata mi intêl khâwm hi a ni a. Kohhran member-te tân chawlhkâr tina Pathian biak inkhâwm leh intihsâwt tawna tûra inpâwl khâwmna dangte a buatsaih thin.

b. Bial

Bial chu Kohhran pahnih emaw a aia tam emaw intanpui tawn tur leh Kohhran hna tikal zêl tura Presbytery khat hnuaia inhlâwm khâwm hi a ni.

c. Presbytery

Presbytery chuan Bial pathum emaw, a aia tam emaw a huam a. Presbytery hna chu a huam chhônga Kohhrante leh inkhâwmho zawng zawngte enkawl hi a ni.

d. Synod

Synod chuan Presbytery pali emaw, a aia tam emaw a huam a. A huam chhông Kohhrante hnathawh leh mamawh zawng zawng enkawl hi Synod hna chu a ni.

e. General Assembly

General Assembly chuan India Ram Presbyterian Kohhrana Synod hrang hrangte chu a thui khâwm a ni.

BUNG II

TUALCHHÔNG KOHHRAN

1. MEMBER NIH DAN

a. Member nih dân sawifiahna

- i) *Dân zawhkimte* : Dân zawhkimte chu Baptisma chang tawh, Kohhranho inpâwlina famkima lawm luh tawhte hi an ni. Anni chauh hi Kohhran thiltih pawimawha chanvo nei thei an ni.
- ii) *Baptisma chang member-te* : Baptisma chang member-te chu Baptisma chang tawh, dân la zawh kim lote an ni.
- iii) *Member dangte* : Member dangte chu Kohhran member atâna an hming ziak tawh, mahse baptisma la chang lote an ni.

b. Baptisma

- i) *Baptisma chang theite* : Kohhran chuan hêng mite hi a huangah seng lûtin Baptisma a chantir tur a ni : (a) Kristian nu leh pate fa zawng zawngte leh Kristian enkawl seilen naupang zawng zawngte; (b) Isua Krista chu an Chhandamtu atâna an pawm thu leh Kristian nuna nun an tum thu vântlâng hmaa puang chhuak apiangte.
- ii) Kohhran chuan a member-ten Baptisma an chan nawn a khap a ni.
- iii) *Nu leh pate tih tur* : An fate an têt laia Baptisma Sakramena Lalpa hnêna hlan hi Kristian nu leh pate zawng zawng tih tur a ni.

c. Lawmluhna

- i) *Dân zawhkim atâna pawmna* : Member tu pawh, Kristian thutak hriatnaah te, an Kristian nungchang leh an awm dânah te Kohhran a lungawi chuan Dân zawhkimah lawm luh tur an ni.
- ii) *Kohhran tih tur* : Kohhran mi, kum sâwm leh pali leh a chung lamte dân zawhkima Lalpa hnêna an puma inhlan tura hruai luh hi Kohhran tih tur a ni.

d. Pêm

Kohhran member, an awmna atanga hmun danga pêmte chuan, an va pêmna Kohhranah an member nihna an pêmpui ang.

2. INRELBÄWLNA LAM

a. Kohhran indin dân

Kohhran chu pâwlho thil a nih anga a hnate tha taka a thawh theih nân a hnuaia târ lan ang hian Kohhran kalhmang zuiin a inrêlbâwl dân tur ruahman a ni.

i) *Preaching Station* : Tualchhông Kohhran pakhat emaw a aia tamin emaw ring lo mite awmnaa rawng an va bâwla Presbyterian dân anga baptisma chantira ringthar an siam apiangte chu Tualchhông Kohhran member-ah an tel nghâl a, Preaching Station siamsak theih nghâl an ni. A dintu tualchhông Kohhran enkawl na leh inrêlbâwl na hnuaiah awmtîr tur a ni ang.

ii) *Branch Church* : Tualchhông Kohhrana member hmun bîka awm khâwmte chu Bialin Branch Church a siamsak thei ang. An awmna Tualchhông Kohhran hriatpuiin Bialin Preaching Station te pawh Branch Church angin a awmtîr thei bawk ang. Branch Church chu an awm thinna tualchhông Kohhran enkawl na leh inrêlbâwl na hnuaiah a awm ang.

iii) *Tualchhông Kohhran* : Branch Church chuan Tualchhông Kohhran anga awm an duh chuan an awmna Tualchhông Kohhran leh Bial kal tlangin Presbytery-ah ziakin dilna an theh lût thin ang a, chu lehkhâah chuan a diltu zawng zawngin hming an zia theuh ang a, bialtu Pastor-in ama ngaihdân a zia bawk ang.

Tualchhông Kohhran atanga indan chung-chângah pawh Bial kal tlangin, Presbytery-ah Tualchhông Kohhran chuan dilna a thlen tur a ni.

Dilna chu Presbytery-in rem a tih chuan Tualchhông Kohhran thar a din ang. Tualchhông Kohhran chu Committee nei tur a ni a, Committee siam a nih hma chuan an awm thinna Tualchhông Kohhranin a enkawl zui zêl ang. Kohhran tinte hi Bialah an tel tur a ni.

b. Kohhran Committee din dân leh Puipate ruat dân

- i) Kohhran chuan a indin atanga a hma thei ang berah ama Puipate a ruat nghâl ang.
- ii) Dân anga Upa thlanna leh anmahni nemnghehna neih zawhah Tualchhông Kohhran tinin rorêltu atân Committee a nei ang a, chutah chuan a theih chen chenah Minister te, Probationary Pastor te leh Upate an tel ang. Kohhranin tûl a tih chuan secret ballot hmangin Dân zawhkim zînga mi Committee-a tel tur Bial kaihhruainain a thlan belh thei ang. Anni hi kum thum chhông an tang ang a, thlan nawn theih an ni ang.
- iii) Kohhran Committee chuan a indin fel hnuah a tûl dân angin Puipate a ruat ang.
- iv) Bialtu Pastor chuan a bial chhông Kohhran khawiah pawh a awm lai a nih chuan hotu chan a chang ang.

c. Kohhran Committee tih tur

- i) *Kohhran enkawl leh rorêlna lam* : Kohhran enkawl leh a rorêlna chu Kohhran Committee

chanpual a ni; entir nân – Kohhran inkhâwm zawng zawng ruahman te, Kohhran Dânpuì ang zêla thununna ken kawh te, Kohhran in leh a thil neih leh a sum enkawl te hi.

- ii) *Lalpa Zanriah* : Kohhran tinin kum khat chhângin Lalpa zanriah *vawî thum* tal neih an tum hrâm tur a ni.
- iii) *Kohhran hming ziajna* : Kohhran tinin member-te leh baptisma changte hming ziajna bu nghet uluk takin an vawng tur a ni.
- iv) *Kohhran hnêna hriattir tur* : Kohhran Committee chuan a tûl châng apiangin, a thurêlte chu Kohhrana Dân zawhkimte inkhâwmah pawm turin a hriattir thin ang.
- v) *Kohhran chhûnga thubuai* : Kohhran chhûnga thubuai rêng rêng chu, a theih chuan Kohhran Committee-ah thlen tur a ni. Kohhran Committee-in a rêl fel theih loh chu Kohhran rorêlna sâng zâwkah a thlen tur a ni.
- vi) *Puipa nghet awm lohnaa Kohhranin Dân a kalpui dân tur* : Bialtu Pastor-in a aiawh tura a ruat Minister te, Pro. Pastor te, Upate emaw an awm loh chuan, Puipa nghet awm lohna Kohhran chuan Dân zawhkim lawm luh te, thunun te, hnawh chhuah te an ti tur a ni lo.

d. Dân zawkim lote

Dân zawkim lo tu mah Kohhran thilah Kohhranin chanvo pawimawh ti turin a hmanh tur a ni lo va, Kohhran Committee member atân emaw, inkhâwmpui palai atân emawah phei chuan a hmanh hauh tur a ni lo.

BUNG III**INTHUNUNNA****1. AAWMZIA LEH A TUM**

Inthununna hi Kohhran inrêlbâwlna kawnga thil pawimawh tak a ni a. Thlarau lam nun atâna thil pawimawh tak tak – Kohhran member-te siam that leh vên himna te, Pathian ropuina atân leh Kohhran thianglimna lam hawia an than len theihna tur leh ringtu rinawm tak an nih theihna atân tanpuitu tha tak a ni. Inthununna hi Kohhran rorêlnain a kenkawh tur a ni.

Kohhran member zawng zawng te, nemngheh an ni emaw ni lo emaw Dân bawhchhe tawh phawt chu thunun tur an ni a. Thununna tling bawhchhiatnate chu – tualthah, inngaih, uire, aien, Kristian rinna kalh zâwnga sakhaw biakna leh dân bawhchhiatna dang Synod-in thununna tlinga a ngaihte hi a ni.

a. Thunun dan hrang hrangte

- i) *Zilh* : Hei hian Dân bawhchhetu chu a pawikhawih hriattîr te, a chung a hlauhawm lo thlang mai thei

laka fîmkhurtîr te, tûn hnua fîmkhur tawh tura fuih te a kâwk a. Mî dangte hriat lohva tih tur a ni.

ii) *Kohhran chanvo pawimawh atanga chawlhîr*: Hetianga thununte chu an sim ngei a ni tih Kohhran Committee-in a hriat chian hma loh chuan thununna hi a hlip tur a ni lo.

iii) *Hnawh chhuah*: Hnawh chhuah chu thil tisualtu Kohhran member a nihna hlihsak hi a ni. Tih âwm loh leh sual zualkai bîk luhlul taka ti lui tlatte chungah chauh he dân hi lek tur a ni. Hetianga nihna inhlihsak hi urhsûn taka tih tur a ni a, a tûl chuan Kohhran mipui hnêna puanzâr tur a ni.

b. Puipate chawlhîr Dân

Kohhran puipa nghet chawlhîr thua chuan, Presbytery-in a chung thu a rêl fel hma chu, a tûl a nih chuan Kohhranin a lo chawlhîr rih thei ang.

c. Dân bawhchhia thununnate

i) *Inngaihna suala tlute* : Kohhran member, inngaihna suala tlute chu a rei lo berah thla ruk chhûng tal Kohhran chanvo pawimawh atanga chawlhîr an ni ang a, chumi hnua an innei tha emaw, an sual an sim ngei tih Kohhranin a hriat emaw chuan thununna chu hlih leh theih a ni ang.

ii) *Dân bawhchhiatna dangte* : Synod-in tha a tih angin Dân bawhchhiatna dangte thununna pawh a rêl thei ang.

d. Member-a lâk luh lehte dinhmun

Kohhran atanga hnawh chhuah tawh chu a lo lût leh a nih pawhin, kum hnih a ral hma chuan Kohhranah chanvo pawimawh chantîr tur a ni lo vang.

2. THIL CHIN THENKHAT CHUNGCHANGA INKAIHHRUAINA**a. Kohhran mite chu hêng lakah hian inthiar fihlim tura beisei an ni**

- i) Milem biak
- ii) Zû te, ganja leh kani siam chhuah emaw, kawl emaw, theh darh emaw, hman emaw te leh rilru tibuai thei damdawi hmansual te.
- iii) Pawisa khelhna chi hrang hrang.

b. Inneihna Thianghlim sâwngbâwl dân

- i) A tûl bîkna hriatpuia, Kohhran Committee-in a hun a tihtawisak a nih chauh loh chuan, inneih duhte chuan a rei lo berah chawlhkâr hnih tal an inneih duh thu Kohhran an hriattîr tur a ni. He dân hi an zawm tih inneihtîrtu pawhin a hre Chiang tur a ni.
- ii) Indian Christian Marriage Act hmanna hmunah chuan, hemi dân hmang hian inneihtîr tur a ni a; hmun dangah erawh chuan a ram mite hnam dân leh kalphung, Synod-in a pawm theih hmanga inneih tur a ni ang.
- iii) Inneihna dân hman thua harsatna a lo awm chuan, Presbytery emaw, Synod emawin a ngaihtuahtu tur Committee a siam ang.

c. Inthenna thu

Indian Divorce Act hmanna hmunah chuan chu dân hmanga inthenna emaw, a ram mite hnam dân leh kalphung Synod-in a pawm theihte hmang emawa inthenna ni lo chu inthenna tlinga pawm a ni lo vang.

BUNG IV**SUM LEH THIL NEIH DANGTE****1. a. Thilpêk thu**

Synod tinah thilpêk chi hrang hrang lâk khâwm dân tha ber hmanga lâk khâwm thin tur a ni. Kohhran mi zawng zawng chu sâwma pakhat leh thilpêk pe vek tura beisei an ni.

Synod-a lût tur thilpêk rêng rêng chu Synod hotute hnênah him takin thawn ngei tur a ni.

b. Bungraw lam thilpek

Kohhran rawngbâwlna atâna thilpêk rêng rêng chu Bial/Presbytery/Synod-ah hriattîr ngei tur a ni. Bial/Presbytery/Synod hriatpui lohvin Kohhran mi tu mah chûng thilpêk enkawltu nghetah chuan an tang thei lo vang.

c. Bial leh Synod hminga enkawl dan

Chutiang thilpêk rêng rêng ram emaw, in emaw, pawisa hlâwm emaw chu Bial/ Presbytery/Synod ruat hotuten a tûl angin an enkawl ang a, Bial/Presbytery/Synod hminga vawn a ni ang.

d. Biak In sak

Kohhranten Biak In sak emaw, sak that emaw an duh chuan Presbytery phalna an la hmasa thin tur a ni.

BUNG V

**KOHHRAN RORELNA DANGTE SIAM DAN LEH
AN TIH TURTE**

1. BIAL**a. Bial siam dân**

Kohhran pahnih emaw, a aia tam emaw inzawm khâwm chu Biala siam theih a ni ang. Dân ang taka Bial siam leh a rem fel chu Presbytery/Synod thuneihna a ni ang.

Kohhran eng emaw zât Bial khata insiam duh emaw, an awmna Bial chhuahsana Bial danga tel duh zâwk emaw an awm chuan, an awmna Presbytery/Synod phalna an la hmasa tur a ni.

b. Bial Inkhâwmpui member-te

Bial Inkhâwmpui member-te chu hêngte hi an ni ang:

- i) Minister te, Pro. Pastor te, Upa te, Bial Puipate leh Bial Committee hrang hrang member-te.
- ii) Kohhran thlan palaite
- iii) Presbytery-in a zât a tuk ang zêla Kohhran Hmeichhia leh Thalai atanga palaite.

Palai pakhatin dân zawhkim ai a awh theih zât tur Presbytery-in a bithliah ang zêlin Kohhran tinin palai an thlang ang (Kohhran aiawh palai tih zîngah

chuan, a theih phawt chuan tualchhông Kohhran Committee member-te telh tur a ni).

c. A thawh tur chin leh tih turte

Bial chuan a huam chhônga Kohhrante leh Kohhran thiltihte a vil tur a ni. Chhông Kohhranten thu an rawn thlente chu a lo ngaihtuah thin ang. Buhfaithâm leh Bial huapa thilpêk rêng rêng chu a enkawl ang a, Kohhrante thawh zât report a dawng thin ang. Sum chungchônga thuneihna chu Bial emaw, a awmna Presbytery emaw, a pum pui huapin Synod kutah emaw a awm ang. Bial chuan a huam chhông pulpit rawngbâwlna a vil thin ang a, pulpit-te chu a hman dân tur dik taka hman a ni ngei em tih a hre thin tur a ni.

d. Puipate thlan dân

Bial Inkhâwmpui hmasaa hun leh hmun ruatah kum tin vawi khat tal Bial Inkhâwmpui neih thin tur a ni ang a. Chairman te, Secretary-te, Finance Officer/Treasurer te kum tin thlan thin tur a ni a, a theih phawt chuan chhôngte chu Kohhran puipa nghette zînga mi thlan tur a ni.

e. Bial Committee-te

Bial tinin a hnuaia Committee-te hi a ruat thin ang :

- i) *Bial Standing Committee* : Bial tinin Standing Committee an nei ang a, chutah chuan Bial Puipate leh member dang 15 an awm ang. Bialtu Pastor te, Pro. Pastor te chu member ni sa an ni. Bial inkhâwmpui inkâra thu hmanhmawh lo awm apiang a ngaihtuah thin ang. Member-te chu kum khat an

tang ang. A theih phawt chuan Bial Puipate chu Kohhran puipa nghet zînga mi thlan thin tur a ni.

- ii) *Nomination Committee* : Nomination Committee-ah hian Bial Chairman leh Secretary te leh member panga Bialin a thlante an tel ang. Pastor chu member ni sa a ni ang. A kum leha Bial Puipa turte a ruatin, inkhâwmpui programme a siam thin ang.
- iii) *Committee dangte* : Tûl a tih angin Bialin Committee dang pawh a siam thei ang.

f. Rorêl ziaakna bu

Bial tinin rorêl ziaakna bu an nei ang a, chutah chuan inkhâwmpui thurêl zawng zawng ziaakin, rorêl hun hnuhnung berah pawm tura chhiar chhuah thin a ni ang.

2. PRESBYTERY

a. Presbytery siam dân

Bial pathum emaw a aia tam emaw inzawm khâwm chu Presbytery-ah siam theih a ni ang. Presbytery siam leh ruahman hi Synod thu a ni ang a. Bial eng emaw zâtin Presbytery siam an duhin emaw an awmna Presbytery chhuahsana a danga tel an duh emaw chuan an telna Synod remtihna an la hmasa tur a ni.

b. Presbytery member-te

Presbytery Inkhâwmpui member-te chu hêngte hi an ni ang :

- i) Minister, Pro. Pastor leh Upate.
- ii) A theih chen chena Kohhran puipa nghette zîng

atanga thlan Presbytery Puipate leh Presbytery Committee hrang hranga member-te.

- iii) Bial Chairman leh Secretary-te.
- iv) A theih chen chena Kohhran Committee member zîng atanga thlan Bial aiawh palaite.
- v) Presbytery bituk anga Kohhran Hmeichhia leh Thalaite atanga palaite.

c. Palai tîrh dân

A hnuaia mi ang hian Pastor Bial tinin Presbytery palai tur an ruat ang.

- i) Member nuai khat leh a aia tam nei Synod-te chuan Dân zawhkim 150 zêlah palai pakhat an ruat thei ang.
- ii) Member sing nga leh nuai khat inkâr nei Synod-te chuan Dân zawhkim 100 zêlah palai pakhat an ruat thei ang.
- iii) Member sing nga aia tlêm nei Synod-te chuan Dân zawhkim 50 zêlah palai pakhat an ruat thei ang.

d. Inkhâwmpui neih zîn dân

Presbytery tinin kum khatah vawi khat tal Inkhâwmpui an nei ziah tur a ni.

e. Puipate thlan dân

Presbytery chuan Moderator te, Secretary-te, Finance Officer/Treasurer te leh Statistician te a thlang thin ang. Presbytery Moderator chu Minister emaw, Probationary Pastor emaw, Upa emaw a ni tur a ni a. Secretary-te, Finance Officer/Treasurer leh Statistician chu a theih phawt chuan Kohhran puipa nghet zînga

mi thlan tur a ni. Finance Officer/Treasurer te hi kum thum chhông an tang ang.

f. Synod-a thu thlen dân

Presbytery Secretary chuan Synod Secretary hnênah Synod inkhâwmpuia palai tur hming te, Committee hrang hrang member tur te leh Synod-a thlen tur an neih apiang Synod inkhâwmpui tan hma chawlhkâr hnih aia tlai lovah an theh lut thin tur a ni.

g. A thawh tur chin leh tih turte

Bial Inkhâwmpui atanga thu lûtte chu Presbytery chuan a ngaihtuah ang a, a theih chen chenah thu tûkna a siam ang. Kohhrante a dinin, a sawnin, a zawm khâwmin, a la lût thei ang a, a bânîrîn a thiat thei bawk ang. Upate a thlangin, a nemnghetin, a sawnin, a thununin, a bânîr thei bawk ang. Synod dân angin Upate thlan leh nemngheh a buatsaih ang a, nemnghehte hming chu Synod a hriattîr ang. A huam chhônga Kohhrante chu thurâwn pein a tanpui ang a, a tûl angin Synod-ah dilna leh ngennate a thlen thin ang. Kohhran rorêlna sâng zâwkten tih tur an pêkte a ngaihtuahin fel takin dân a vawngin Synod-a palai turte a ruat ang. A huam chhônga Kohhran thil neihte chu Synod hmingin Synod aiawhin a vawng ang (tûl bîk thilah chuan Synod-in ama hmingin a enkawl thei ang). A enkawl Kohhrante inchhiarna chu kum tin a dawngin a thlîr thin ang. Thilpêk zawng zawng report-te dawngin, Committee hrang hrangte report pawh a dawng thin ang.

h. Telna insawn

Kohhran mal, Presbytery pahnih emaw a aia tam emaw inrina laia awm, an awmna Presbytery atanga Presbytery danga insawn duh an awm chuan Kohhran kalhmang dik tak zuiin an awmna Presbytery-ah an dîl ang. Presbytery-ten a ramri an tihfel theih loh chuan Synod rêl fel turin an thlen tur a ni.

i. Report

Presbytery-te chuan Bial Inkhâwpui atangin report an dawng thin ang.

j. Thlarau lam thupui

Presbytery Inkhâwpui apiangin Pathian biak inkhâwm tum khat tal chu Presbytery hmasain Thlarau lam thupui a lo thlan tawh sawi nân hman tur a ni.

k. Committee hrang hrangte

Presbytery tinin hêng a hnuaia Committee hrang hrangte leh, tûl a tih chuan, a dangte pawh a siam thei ang.

- i) *Standing Committee* : Standing Committee-ah chuan thlan member sawmhnih leh panga aia tam lo an awm ang. Minister-te, Pro. Pastor te leh, Presbytery Puipate chu member ni sa an ni. Presbytery inkhâwpui inkâra thu pawimawh leh tûl zual apiang a ngaihtuah thin ang.
- ii) *Nomination Committee* : Nomination Committee-ah chuan Moderator leh Secetary-te leh member dang panga an awm ang. Kum tinin Presbytery Puipa turte leh Committee member turte a rawt

ang a, Presbytery leha thusawitu turte leh thlarau lam thupuite a rawt ang.

- iii) *Sub-Pastoral Committee* : Sub-Pastoral Committee-ah chuan Moderator leh Secretary-te leh Presbytery-in a theih chen chena Kohhran puipate zînga mi a thlan member pakua an awm ang a, chûng zînga pathumte chuan Synod Pastoral Committee-ah Presbytery ai an awh ang.

Sub-Pastoral Committee chuan tûla a hriat angin thil a lo siam rem lailâwk thei ang a. Presbytery huam chhûnga Kohhran chawmna lam rêng rêng a ngaihtuah ang a, a rawtna chu Presbytery-ah a thlen thin ang.

- iv) *Finance Committee* : Finance Committee-ah chuan Puipate leh Presbytery Inkhâwmpuiin member pathum a thlante an awm ang a. Bial Finance Officer/ Treasurer- te chu he Committee-ah hian member ni sa an ni ang.

Finance Committee chuan Presbytery emaw, Standing Committee emaw pawm turin sum lam thil rêng rêng a ngaihtuah thei ang.

l. Finance Officer(s)/Treasurer

Presbytery Finance Officer(s)/Treasurer chuan sum lût leh chhuak ziahna bute fel takin an vawng tur a ni.

m. Thil neih enkawltute

Presbytery chuan Kohhran in nghet te, sum hnâr nghet atâna thilpêk dah thatte chu a enkawltu turte a ruat ang a, chutiang thilpêk a dawn apiang chu Synod a

hriattîr thîn ang.

n. Sum endiktute

Presbytery tinin Presbytery sum endiktu tur mi pahnih an ruat thîn ang.

o. Synod-a palai tîrh dân

Presbytery tinin kum tin Synod Inkhâwmpuia palai turte Kohhran Hmeichhia leh Thalaite teline an ruat thîn ang. Chûng palaite chu a theih phawt chuan Kohhran puipa nghet zînga mi an ni tur a ni. Synod tê deuhte chu ngaihnathiamna chin neih theih a ni.

p. Rorêl ziajna bu

Presbytery tinin rorêl ziajna bu an nei ang a. Presbytery rorêl zawng zawng chu chhiar chhuaha pawm thlap tur a ni.

3. SYNOD

a. Synod siam dân

Presbytery pali emaw a aia tam emaw inzawm khâwm chu Synod a siam theih a ni ang. Synod siam leh ruahmanna chu General Assembly thu a ni ang. Presbytery-te Synod siam emaw an Synod awmna chhuahsana a danga tel duh emaw chuan General Assembly phalna an la tur a ni.

b. Synod Inkhâwmpuia tel tur te

Synod Inkhâwmpuia tel turte chu hêngte hi an ni ang:-

i) Minister leh Pro. Pastor,

- ii) Synod Committee-a member-te,
- iii) Presbytery Moderator leh Secretary-te,
- iv) Presbytery thlan palai te,
- v) Synod bituk anga Kohhran Hmeichhia leh Thalai atanga palaite.

c. Synod chhimtute

Synod chhimtu mi tu pawh, Synod-in rem a tih chuan, chumi tum atân chuan palaia pawm theih a ni.

d. Palai intirh dân

A hnuaia mi ang hian Presbytery-ten anmahni Synod Inkhâwmpuii theuhvah palai an tîr thei ang.

- i) Member nuai hnih leh a chung lam nei Synod-ah chuan Dân zawhkim 400 zêlah palai pakhat an ruat thin ang.
- ii) Member nuai khat leh nuai hnih inkâr nei Synod-ah chuan Dân zawhkim 300 zêlah palai pakhat an ruat thin ang.
- iii) Member sîng nga leh nuai khat inkâr nei Synod-ah chuan Dân zawhkim 150 zêlah palai pakhat an ruat thin ang.
- iv) Member sîng nga aia tlêm nei Synod-ahte chuan Dân zawhkim 50 zêlah palai pakhat an ruat thin ang.

e. Puipate thlan dân

Synod tinin Moderator te, Moderator Elect te, Secretary-te, Finance Officer-te leh Statistician te an nei ang.

Moderator chu kum tinin Minister-te zînga mi thlan a ni ang. Secretary-te, Finance Officer-te leh Statistician chu, a theih phawt chuan, Kohhran puipa nghet zînga mi thlan tur a ni. Secretary-te chu kum hnih chhûng an tang ang a, Finance Officer-te chu kum thum chhûng; Statistician erawh chu kum tin thlan tur a ni.

f. Inkhâwmpui neih zîn dân

Synod tinte chu kum tin vawî khat tal an inkhâwmpui thin ang.

g. Synod tih turte

Synod chuan Presbytery-te a dinin, a fîn khâwmin, a then darhin, a thiat thei ang. An ramrite a khamsakin an dinhmun a thlirsak thei ang a, dân ang taka an thu theh luh leh ngennate rêlsakin a bial pum pui chu fel takin a vawng ang. Synod chuan Mission Board a din thei ang a, Pathian thu zirna leh Kristian hnathawhna hmun (institution) dangte a enkawl thei ang. Synod chuan Minister-te a nemnghetin, a sawnin, a pawmin, a chawlhîrîn, a thununin, a bântîr thei ang. Pastor-te chu Bial-ah a dahin a chhuahtîr thei ang a, Probationary Pastor-te thuneihna a pein, a thununin, a bân thei bawk ang.

Synod chuan ama sum chungah thuneihna tâwp a nei ang. A huam chhûnga Kohhrante thil neih zawng zawng chungah pawh Synod chuan thu a nei a ni.

h. Hming lam leh thuchah hnahnung

Synod Inkhâwmpui tantirhah palaite hming lam a ni ang a, chumi zawhah Moderator-in Synod chu dân anga rorêl thei turin a hawng ang. Moderator chuan a hna a tâwpsan dânin Synod hnênah thuchah hnahnung a sawi ang.

i. Thurêlte hriattîrna

Synod chuan, thurêl zawng zawng ziaakna bu a nei ang a. Chûng thurêlte chu chhiar chhuakin Synod-in a pawm ang a. Synod Inkhâwmpui thurêlte chu a bua chhuah tur a ni. Synod tinin an hnathawh dân chu India ram Presbyterian Kohhran General Assembly-ah an theh lût thin ang.

j. Committee hrangte

Synod tinin a hnuaia sawi ang hian Committee nghet a siam ang:-

- i) Executive Committee
- ii) Nomination Committee
- iii) Pastoral Committee
- iv) Theological Education Committee
- v) Finance Committee
- vi) Mission and Evangelism Committee
- vii) Trust Committee
- viii) Committee dangte

Executive Committee leh Nomination Committee leh Pastoral Committee te tih loh, Committee dangte chuan an Chairman leh Secretary tur an thlang ang a, an Committee thurêlte chu pawm turin Synod-ah an theh lût thin ang.

- i) *Executive Committee* : Executive Committee-ah chuan Synod Puipate, Synod Executive Secretary-te, Synod ruat member 5-10 te, leh Synod huam chhûnga Presbytery tinin dân ang taka member pathum theuh an thlante an tel ang. Synod ruat leh Presbytery thlante chu kum thum chhûng an tang ang a, thlan nawn theih an ni. Member zâtve an awm chuan rorêl thei an ni ang.

Executive Committee thuneihna leh tih turte chu hêngte hi a ni :

- (a) Hna kal pângngai, Synod aiawha bawhzui ngai leh Synod inkhâwmpui nghâk hman lo thil hmanhmawh bîk ngaihtuah te;
- (b) Presbytery-te sum hman tur ruahmanna lo thlir nawn leh chin fel te, Synod budget tur lo buatsaih leh Synod a rawtna thlen te;
- (c) A huam chhûnga Kristiante, Synod dang mi leh Kohhran pâwl danga mi lo awm vete telin, thlarau lam mamawh ngaihtuahsak te, a bial chhûnga rinna dang vuantute hnêna Chanchin Tha hril dân kawng zawn leh Synod-a rawtna thlen te;
- (d) Synod sum mamawh turte thlîra a tûl anga Presbytery-te sum dinhmun thlirpui leh thurâwn pêk

te, audit report ngun taka biha a tûl anga bawhzui te;

- (e) A khawihthu bîk Committee emaw, Association emaw-ten thu an thlen anga ram leh in chungchângte leh dân khawih thil dangte thlirpui leh a tûl anga bawhzui te;
- (f) Dânpuì khawih thei thil emaw, ram chhûnga Christian Council leh Kohhran pâwl dangte nêna inlaichinna thu emawte lo bih chiana, a rawtna Synod-a thlen te.

Executive Committee hi a tûl anga zingin a thu thin ang.

- ii) *Nomination Committee* : Nomination Committee member-te hi kum tin thlan tur a ni a, Synod Moderator leh Secretary-te telin member 13 an awm ang. Kum leha Synod Puipa turte a lo ruat lâwkin, Synod programme turte a buatsaih ang. Synod Committee hrang hrang member ruat lâwk tûl apiang a lo ruat ang. Member 8 an awm chuan rorêl thei an ni ang.
- iii) *Pastoral Committee* : Synod Moderator leh Secretary-te leh Finance Officer-te leh Pastoral Ministry changtu Executive Secretary-te chu member ni sa an ni a; he Committee atân hian Presbytery tinin member pathum theuh an thlang bawk ang. Member thlante chu Sub-Pastoral Committee member zînga mi ni thei se a tha. Member-te chu kum thum chhûng an tang ang. Member hmun thuma thena hmun khat an awm chuan rorêl thei an ni ang.

Sub-Pastoral Committee-te thu rawn thlen leh Synod huam chhûnga Pastor hna lam thil zawng zawng

a ngaihtuah thin ang a. Kum tinin vawi khat tal an thu thin ang.

- iv) *Theological Education Committee* : Theological Education Committee-ah chuan member 10 atanga 15 an awm thei ang, chùngte chu – Synod Moderator leh Secretary (Senior) Theological Education changtu Executive Secretary te, (Theological College nei Synod-ah Principal, Vice-Principal, Registrar te) leh ruat member mi 7-12 te. Ruat member-te chu kum thum an tang ang a. Member zawng zawng zâtve an awm chuan rorêl thei an ni ang.

Pathian thu zir duhte dilna leh Synod huam chhûnga Pathian Thu zirna lam thil rêng rêngte a ngaihtuah ang a. A tûl anga zingin a thu thin ang.

- v) *Finance Committee* : Finance Committee-ah hian Synod Moderator, Secretary-te leh Finance Officer-te leh Synod-in member dang 5 a ruatte an awm ang a. Presbytery Finance Officer-te/Treasurer te chu member ni sa an ni ang.

Finance Committee chuan Synod emaw, Synod Executive Committee emaw pawm turin sum lam thu zawng zawng a rêl thei ang.

- vi) *Mission and Evangelism Committee* : Mission and Evangelism Committee-ah chuan Synod Moderator leh Secretary (Senior) te, Ramthar changtu Executive Secretary te, (Synod-in Mission Board Secretary a neih chuan a tel tura ngaih a ni) leh Presbytery tin atanga member thlan pahnih theuhte member an ni ang.

Member-te hi kum thum chhông an tang ang a. Member zawng zawng zâtve an awm chuan ro an rêl thei ang.

Synod pawm turin Committee chuan Mission leh Evangelism lam thil rêng rêng chu a rêl thei ang. A tûl anga zingin a thu thin ang.

vii) *Trust Committee* : Synod-in Memorandum of Association a neih angin Trust Committee a din ang a. He Committee-ah hian Chairman leh Synod ruat member pariat an awm ang. Trust Committee changtu Executive Secretary chu Committee Secretary a ni ang. A term rei zâwnng chu kum thum a ni ang. Member paruk an awm chuan ro an rêl thei ang.

He Committee hi Synod ram leh in lâk sawn theih chi leh lâk sawn theih loh chi zawng zawngte enkawltu a ni ang a, a hnuaiâ târ lan ang hian hna a thawk ang:

(a) Ram emaw in emaw a leia lei te, a thlâwna miin an pêk te, a hawha hawh te, a inthleng ang chi emaw te a vawngin a enkawl ang. Ram leh in lâk sawn theih leh theih lohte, Kohhran tâna a tûl leh mamawh dânâ thuin a hawhin, a tiral thei ang a, dahkham ngai leh inthleng tûl thilah pawh tha a tih angin a rêl thei ang.

(b) Biak In te, Chapel te, Society te, School te, College te, Hostel te, Boarding te, Hospital te, Dispensary te, Kohhran Hall te, Kohhran hmun te, thlânmuah leh Minister leh thawktu dangte chênna in te, mi chanhai leh fahrah enkawlina in te a dinin, a enkawlin, a puibâwm thin ang a, Kohhran hmabâk tihpuitlin dân a ngaihtuah ang.

- (c) Kohhran thiltum tihpuitlinna atâna thil tangkai leh tûl chawp ang chi zawng zawngte a thawk ang.
- (d) Synod leibat leh rulh ngai thilte (liability) a ngaihtuah ang.
- (e) Synod-in tih tura a pêk thawh kawngah Synod Executive Committee remtihna a lain report a pe thei ang.

k. Sum endikna

Synod chuan kum tina a sum endik theihna dân a siam ang.

l. Hmeichhia leh Thalaite rawngbâwlna

Kohhran tin leh Bial tinah te, Presbytery tin leh Synod tinahte Pathian be tur leh inpâwl hona atân leh, an rawngbâwlna tihhmasâwn nân hmun remchâng apiangah Hmeichhe inkhâwm leh Thalai inkhâwm a awm ang. Hmeichhia leh Thalaite rawngbâwlana tel tur aiawh insiam dân chu, Bial leh Presbytery leh Synod-ten anmahni huam chin theuhah an siam fel tur a ni.

Kohhran Hmeichhia leh Thalaite Programme leh an chêt vêlna zawng zawng hi Presbyterian Church of India Thurin leh inrêlbâwl dân nêna a inmil tur a ni.

m. Sunday School Exam

Sunday School Exam hi kum khat chhûnga zir tur tuk chin zêlah neih thin a ni ang a, a remchân angin exam- te hi Tualchhûng emaw, Bial emaw, Presbytery emaw Synod emaw huama neih tur a ni.

n. Thlarau lam thupui

Synod Inkhâwmpui apiangin Pathian biak inkhâwm tum khat tal chu Synod Inkhâwmpui hmasain a lo thlan tawh Thlarau lam thupui sawi nân hman ngei tur a ni.

4. REGIONAL ASSEMBLY

General Assembly remtihnnain Synod pahnih emaw a aia tam emaw kal khâwmin Regional Assembly an din thei ang a; Regional Assembly chu General Assembly-in a hawng ang. Regional Assembly hi Kohhran rorêlna a nih loh avângin a hnathawhna atân dân a insiam thei ang a, mahse chûng dânte chuan Dânpuia mi a kalh tur a ni lo. Synod hnuaia mi ni lo Project intâwm chi chungchâng chu General Assembly Executive Committee-in a dawng thin ang.

5. GENERAL ASSEMBLY

India Ram Presbyterian Kohhrana tel Kohhrante chungá thuneitu, Kohhran rorêlna sâng ber pakhat a awm ang a, chu rorêlna chu General Assembly tih a ni ang.

a. General Assembly Inkhâwmpui member

General Assembly Inkhâwmpuia member-te chu hêngte hi an ni ang :

- i) Minister leh Probationary Pastor zawng zawng,
- ii) General Assembly-a Committee hrang hrang member-te,
- iii) Synod Moderator leh Secretary-te,
- iv) Synod thlan palai te,

v) Presbyterian Women Fellowship palai sâwm

vi) Presbyterian Youth Fellowship palai sâwm.

b. Palai tîrh dân

General Assembly-a palai turin Synod-in Presbytery tin atangin member panga zêl an thlang ang a, chungte chu a theih chen chenah Upate zînga mi thlan tur a ni.

c. Inkhâwmpui neih zîn dân

General Assembly Inkhâwmpui chu a kum hnihna zêlah, General Assembly hmasain hun leh hmun a ruatah neih thin a ni ang.

d. Puipate thlan dân

General Assembly chuan Moderator, Moderator Elect, Secretary pahnih, Treasurer leh Statistician a nei ang.

Moderator leh Moderator Elect-te chu kum hnihna zêlah Minister zînga mi thlan tur a ni a, Secretary, Treasurer leh Statistician te chu Kohhran puipa nghette zînga mi thlan tur a ni ang. Secretary chu General Assembly Inkhâwmpui tum hnih chhûng tang tur an ni a, General Assembly Inkhâwmpui apiangin Secretary thar pakhat thlan thin tur a ni. Treasurer chu General Assembly Inkhâwmpui tum hnih chhûng a tang ang a. Statistician chu kum hnihna zêlah thlan a ni ang.

e. General Assembly Committee-te

i) *Nomination Committee* : Nomination Committee a awm ang a, chutah chuan General Assembly Puipa te, Administrative Secretary-te zînga pakhat

leh Synod tin atanga member pakhat theuh an awm ang. Moderator, Moderator Elect, Secretary-te, Treasurer leh Statistician tur te leh Nomination Committee tih loh General Assembly Committee dang member turte a rawt thin ang. Member pariat an awm chuan rorêl thei an ni ang.

A chung a sawi Synod tin atanga member-te leh Administrative Secretary pakhat chu General Assembly pawm turin Executive Committee-in a rawt thin ang.

ii) *Executive Committee*

(a) *A siam dân*

Executive Committee a awm ang a, hêngte hi member an ni ang :

- (1) Moderator, Moderator Elect, Secretary-te, Treasurer, Statistician, Administrative Secretary-te leh General Assembly Theological Education Committee Secretary.
- (2) General Assembly-in Synod tin aiawh pakhat theuh a ruat ang.
- (3) Member nuai thum emaw a aia tam emaw nei Synod chuan member pariat an ruat ang.
- (4) Member nuai hnih leh nuai thum inkâr nei Synod chuan member panga an ruat ang.
- (5) Member nuai khat leh nuai hnih inkâr nei Synod chuan member pali an ruat ang.
- (6) Member nuai khat nei tling lo chuan member pathum an ruat ang.

- (7) Presbyterian Youth Fellowship leh Presbyterian Women Fellowship-ten member pahnih ve ve an ruat ang.

A theih phawt chuan member-te chu Synod hrang hrang Executive Committee member-te zînga mi thlan an ni ang a, kum thum chhûng an tang ang.

Moderator leh Secretary pakhat tela member zâtve an awm chuan rorêl thei an ni ang a, a theih hrâm chuan Synod tina mi member pakhat theuh tal an awm tur a ni.

(b) Executive Committee thuneihna

Executive Committee thuneihna chu hêngte hi a ni ang :

- (1) General Assembly Inkhâwmpui hun nghâk hman lo thila General Assembly tih tur lo tih;
- (2) Kum leh atâna General Assembly budget a buatsaih;
- (3) Missionary-te tirh leh dawn thua mawh phurh;
- (4) Kristian eng emaw zât, Synod khat atanga Synod danga insuan emaw, General Assembly Bial pawns lama insawn emaw an awm a, an thlarau lam mamawh phuhrûk dân kawng zawn;
- (5) Synod hrang hrangin Chanchin Tha hril hnaa hma thar an lâk, Kohhran pum tâna hlâwk tâng ber tur ngaihtuaha lo khairual;

- (6) India ram Presbyterian Kohhran thil neih eng pawh vawngtu, Property Trust siam;
- (7) Wales ram Presbyterian Kohhran leh Kohhran pâwl dangte chungchâng zir leh thurâwn pêk;
- (8) General Assembly pawm tura Nomination Committee member tur Synod tin atanga pakhat theuh rawt;
- (9) Rorêl tum khat atân zêl thurâwn petu emaw member puitling ni ve turin emaw mi panga thleng a ruat belh thei ang.

iii) *Theological Education Committee* : Theological Education Committee a awm ang a, member-te chu hêngte hi an ni ang :

General Assembly Moderator, Secretary-te, Treasurer leh General Assembly Administrative Secretary-te, Aizawl Theological College leh John Roberts Theological Seminary Principal-te, Synod tin atanga member pahnih theuh ruat te. Committee chuan ama Chairman leh Secretary tur a ruat ang. Member-te chu kum thum an tang ang a, thlan nawn theih an ni ang. Committee chu General Assembly huam chhûnga Pathian thu zirna tihhmasâwn leh vil thua mawhpurtu a ni ang. Theological College-te hnathawh khairualin College enkawltu Board report-te chu kum tin a dawng ang.

Pathian thu zirna lam atâna kum tin budget a siam chu Executive Committee-ah a thlen ang. Kum

tinin vawi khat tal a thu ang a, a hun chu General Assembly Inkhâwmpui laiin emaw, Executive Committee thut laiin emaw ni thei se a tha.

- iv) *Mission & Evangelism Committee* : Mission & Evangelism Committee member-te chu hêngte hi an ni ang :

Moderator, Secretary-te, Treasurer, General Assembly Administrative Secretary-te leh Synod tin aiawh mi pahnih theuh. Member turte chu a theih chen chenah General Assembly Executive Committee member leh an Synod-a Ramthar Committee member ni kawp zînga mi Synod-in a ruat ang. Member-te chu kum thum an tang ang. Moderator chu Chairman a ni ang a, General Assembly Administrative Secretary-te zînga Mission & Evangelism changtu chu Secretary a ni ang. Member zâtve an awm chuan ro an rêl thei ang. Committee-in tûl a tih chuan meeting tum khat atân mi pathum thleng phungbawm a sâwm thei ang a, an sênso pawh General Assembly-in a tum ang. Committee chu kum tin vawi khat tal a thu ang.

He Committee hian General Assembly leh Executive Committee-ah hêng kawngahte hian mawh a phur ang :-

- (a) Assembly huam chhûng leh a pâwna Mission leh Chanchin Tha hril hna tha taka enkawl leh tihhmasâwn.

- (b) Synod-ten Mission leh Chanchin Tha hril hna an thawhte a tûl anga khairual.
- (c) General Assembly hnuaia Kohhrante Chanchin Tha hril leh Mission hnua an mawhphurhna hre tura chawh harh leh hmasâwtîr.
- (d) Chanchin Tha hril darh hna zir hona leh inrâwn khâwmna buatsaih thin.
- (e) A hma lama sawi tâkte chungchânga Synod hrangte dâwr kual.
- (f) Hemi puala General Assembly sum a tangkai thei ang berin a hmang ang a, chumi âtn chuan Committee chuan :
 - (1) Mission leh Chanchin Tha hril hna âtâna sum tuak dân kawng dapchhuah thuah mawh a phur ang;
 - (2) General Assembly emaw, Executive Committee emaw pawm âtn budget a ruahman ang.
- v) *Christian Communication Committee*
Committee-a member-te chu : General Assembly Moderator, Secretary-te leh Administrative Secretary-te, Synod tin atanga ruat member pahnih theuh leh General Assembly ruat member pahnih an ni ang. General Assembly-in Committee Chairman leh Secretary a ruat thin ang a, member-te tan hun chhông chu kum thum a ni ang.

A mawhphurhna leh tih turte : Committee chuan General Assembly leh Executive Committee-ah hetiang hian mawh a phur ang :

- (a) India Ram Presbyterian Kohhranin thuziak lama hma a lâkna leh thil a kalpui dân turah General Assembly chu thurâwn a pe thin ang.
- (b) Synod/Presbytery leh Biala Christian Communication Committee awm apiangte thil kalpui dân leh hmalâk dân khairuulsak te, Bookroom leh lehkhabu dâwr dang India Ram Presbyterian Kohhran nêna inzawmna neite khairual hna te a thawk ang. Committee chuan a khairuulsakte hnên atang chuan report a dawng bawk ang.
- (c) Sum leh tanpui dilna General Assembly Executive Committee hnênah a thlensak thin ang.
- (d) Thuziak te, Audio-Visual Aids, Video Cassette, CD siam leh theh darh dân zir ho nân Workshop, Seminar, Consultation leh Conference te ram pum huap emaw ram bial khat huapin emaw a buatsaih thin ang.
- (e) India Ram Presbyterian Kohhran leh Kohhran pâwl dangte inkâra thuziak lama thawhnaah Kohhran aiawhtu a ni ang.
- (f) General Assembly-in emaw, Executive Committee-in emaw Kohhran hming leh, a aiawha chhuah tura a rêl *Presbyter* emaw

chanchinbu leh lehkhahu dang emaw eng pawh endik te, chhut te, chhuah te leh thawn darh te a buaipui thin ang.

- (g) Thuziak lam te, Audio-Visual lam te, Video siam chhuah lam te, lehkhah ziaak pawimawh vawn that lam te leh lehkhahu hlui vawn that kawngah te tânlaia hmasâwnna thar awmte a ngaihvenin Kohhrana chutiang lam buaipui turte chu a thil hriatte a hrilh thin ang.

vi) *General Assembly tih turte* : General Assembly thuneihna leh tih turte chu hêngte hi an ni ang:-

- (a) Synod tin atanga report, inchhiarna, dilna leh thu thlen lo dawn;
- (b) A thawhpui Kohhrante leh Council-te thu thlen lo dawn;
- (c) General Assembly Committee-te report leh thu lo dawn;
- (d) PWF leh PYF atanga report leh thu, a enkawltu Administrative Secretary kal tlanga lo dawn;
- (e) General Assembly bial pâwna Kohhranin Mission hna a thawhte sawi ho leh rôl fêl leh a mawh lâk;
- (f) A tûl huna Synod thar siam leh a awm sa sîksawi;
- (g) General Assembly leh Kohhran pâwl dang inkâra thu awm apiang ngaihtuah;
- (h) General Assembly leh Wales Ram Presbyterian Kohhran inkâra thu awm apiang ngaihtuah;

(i) General Assembly nêna inkaihnhawih thu eng pawh a chung a târ lan loh rêl fel thin te.

vii) *General Assembly Thurêl Minute* : General Assembly thurêlte chu Sâptawnga ziakin chhuah thin tur a ni.

viii) *Thlarau lam thupui leh Lalpa Zanriah* : General Assembly chuan Pathian biak inkhâwm tum khat tal General Assembly Inkhâwmpui hmasain thlarau lam thupui a lo thlan tawh sawi nân a hman thin ang a. General Assembly Inkhâwmpui apiangin Lalpa Zanriah theh tur a ni ang.

ix) *Kohhran danga palaina*

A tûl hun apiangah General Assembly chuan Wales Ram Presbyterian Kohhran General Assembly leh Kohhran pâwl dangah palai a tîr thin ang.

BUNG VI

KOHRAN PUIPATE THLAN DAN LEH NEMNGHEH DAN

Inthlan chu Kohhran rawngbâwl hna bîk chang tura urhsûn taka mi thlan chhuah hi a ni.

Nemnghehna chu Kohhrana rawngbâwl hna bîk chang tura urhsûn taka mi serhhranna a ni.

1. UPATE

a. Inthlanna

Kohhranin Upa turte thlan a duh chuan Bial kal tlangin Presbytery-ah dilna a thlen ang a, Presbytery-in rem a

ti h chuan, a thlanpuì turin Minister te, Probationary Pastor te, Upa te zînga mi pahni h emaw a aia tam emaw a tîr ang. Inthlan chu tu ma hriatpuì lohva ziaka ti h ngei tur a ni a, duhthusâmah chuan inthlanna tur lehkhah chu Presbytery duh ang taka siam ni thei se a tha a ni.

b. Thlang thei tur Dân zawhkim zât

Kohhrana Dân zawhkim awm zawng zawng zâtve tal an inkhâwm loh chuan inthlanna neih theih a ni lo vang.

c. Tlin theihna vote tûl zât

Thlangtu zawng zawng hmun thuma thena hmun hnih talin an thlan loh chuan tu mah tlinga puan loh tur a ni.

d. Upa atâna thlan theih lohte

Kum nga chhûng tal Dân chhûnga awm lo leh Dân zawhkim hnua uirêna suala tlute chu Upa atân tu mah thlan tur a ni lo.

e. Presbytery-a hming pêk luh

Upa atâna thlante hming chu thlanpuituten Presbytery-ah an pe lût ang a, Presbytery chuan anmahni nemnghehna a buatsaih ang.

f. Upa atâna tling

Upa atâna thlan turte nungchang thua Kohhrante chu an duhtui hle tur a ni. Thlan tlin tu pawh, Pathian thu hriatnaah emaw, Kristian nungchangah emaw, tling

tâwk lova an hriat chuan thlan a nihna chu Presbytery chuan a pawm lo thei a ni tih Kohhranten an hre Chiang hle tur a ni.

g. Nemngheh dân

Presbytery-a Upa nemnghehna inkhâwmah chuan a tlângpuiin a hnuai mite hi a tel tur a ni:-

- i) Kohhranin amah an thlan tlin chungchângah ama rilru vântlâng hmaa a puanna.
- ii) Chanchin Tha bu li te, Sakramen te, Thununna leh Kohhran Thurin puanchhuah sâwmte atanga zawhnate lungawi thlâk taka a chhânna.
- iii) India Ram Presbyterian Kohhran Dânpuì hi rilru taka a pawm thu puanna.
- iv) Upa atâna thlan a nihna pawm nghehna.
- v) Presbytery Moderator chuan serhhranna thu hetiangin a chham ang (Inkhâwmho ding sela):

“Lalpa Isua Krista, Kohhranho Lalber leh Lu ber hmingin leh, he Presbytery thuneihna hian nang hi Presbytery chhûnga Kohhran Upa atân kan nemnghet a che. He hna hi lâwm taka i hlen chhuah theih nân, mahni chanchin sawi leh tur i nih ang ngeiin taima takin thawk ang che. Kan Lalpa Isua Krista khawngaihna chu i hnênah awm rawh se. Amen.”

- vi) Fuihna thuchah leh hlanna tawngtai.

h. Upa pêm chungchâng

Upa chu khaw dang Kohhranah a pêmìn, a va pêmna Kohhranah Upa atân thlan nawn ni lo mah se, Presbytery member a nihna chu a la chhawm zêl a ni. A va awmna Presbytery-ah leh Bial Inkhâwmpuiah member ni sa a ni ang.

i. Nemngheh nawn tûl lo

Upa chu hmun dang Kohhrana a pêmìn, Presbytery aiawh pahnih emaw a aia tam emaw tela inthlannaah thlan nawn a nih loh chuan, a va pêmna Kohhranah chuan Upa a ni lo va. Thlan nawn a nih erawh chuan Presbytery-ah hriattîr a ni ang a, nemngheh nawn erawh chu a tûl lo vang.

j. Pêm lehkha

Presbytery pakhat atanga Presbytery danga Upa pêm chu pêm lehkha pêk tur a ni.

k. Kohhran Upa pêm lêl lehte dinhmun

Kohhran Upa pêm, a awmna Kohhrana pêm lêl leh chu Kohhran Upa pângngai a ni leh nghâl ang.

2. PROBATIONARY PASTOR-TE**a. Zir tura ruat zir zo**

Probationary Pastor-a lâk tur chu General Assembly-in zir tura a tukte Pathian thu zirna hmuna zir zo tawh a ni ngei tur a ni.

b. A hnathawh turte

Probationary Pastor chuan amah enkawl tura ruat Pastor emaw, Minister emaw kaihhruaina hnuaiah, amah râwn chungin, Pastor hna a thawk ang (Sakramen rawngbâwlna tih loh chu) Pastor hna thawk âwm mi a nih leh nih loh te, Kohhran dân a zawm leh zawm loh te Synod-a report tur a ni.

c. Ruat dân

Synod Inkhâwmpui laiin emaw, Executive Committee thut laiin emaw Synod chuan Probationary Pastor turte a la ang.

Hêng thute hmang hian Moderator-in an hnênah thuneihna a hlân ang :

“Lalpa Isua Krista, Kohhranho Lalber leh Lu ber hmingin leh he Synod thuneihna hian nang hi Probationary Pastor ni turin kan ruat a che. Tûn atang chuan Sakramen rawngbâwlna tih loh chu, Pastor hna i thawk tawh ang a. “Hnathawktu, thutak thu fel taka hmang chu zak tur a ni lo angin, Pathian ngaiha thaa inentîr turin thahnemngai rawh”. Kan Lalpa Isua Krista khawngaihna chu i hnênah awm rawh se. Amen.”

d. Dahnghehna

A awmna tur Biala dah nghet turin Synod-in Minister leh Upa a ruat ang.

e. Enchhin hun chhông

Enchhin hun chhông chu, a chhan tha tak a awm loh chuan, kum thum aìn a tlem tur a ni lo. Enchhin dan kawng hnih a awm :

i) A zira zir tur

- (a) Synod Theological Education Committee chuan Probationary Pastor-te zir tur leh zir dân tur kaihhruaina a siam ang a; Probationary Pastor chuan a theih ang leh a tûl dân ang zêlin amah enkawltu hnênah ziakin report a pe thin ang.
- (b) Theological Education Committee chuan kum tinin intuai tharna atâna zirna leh exam a buatsaih thin ang.
- (c) Zir turte chu hengte hi a ni ang – Bible, Theology, Religion, History of Christianity, Christian Ministry, Christian Education leh subject dangte.

ii) A thawha thawh tur

Presbytery Sub-Pastoral Committee-in uluk takin a hnathawh dân a kaihruai ang a, kum khat chhông a thawh dân chanchin chu Synod-ah a thlen thin ang.

f. Pastor puitlinga siam dân

Enchhin hun chhông kum thum a lo ral a, Bialin Probationary Pastor chu Pastor puitlinga siam tlâka a ngaih chuan, Sub-Pastoral Committee kal tlangin Presbytery-ah dilna a thlen tur a ni. Presbytery chuan uluk taka a

thlir hnua a lungawi tâwk chuan Synod-ah a dilpui ang. Nemnghehna chungchânga thu tâwp neitu chu Synod chauh a ni.

g. Insawntîr dân

Sub-Pastoral Committee chuan ama Presbytery bial chhângah chuan Probationary Pastor chu a sawn thei ang a, a sawn thu chu pawm turin Presbytery leh Synod-ah a thlen ang. Presbytery pakhat atanga Presbytery danga Probationary Pastor sawn erawh chu Synod chauhvîn a ti thei ang.

h. Chawlh lailâwktîr dân

Probationary Pastor-in rawngbâwlna leh nun dânah thil a tihsual chuan, Presbytery hriattîr tur a ni a, Synod-in a chungthu a rêl fel hma pawhin a lo chawlh lailâwktîr thei ang.

3. MINISTER LEH PASTOR-TE

a. An mawhphurhna leh tih turte

Minister chu hna bîk thawk tura ruat a nih loh chuan, Pastor hna thawk tur a ni a, a Bial chhônga Pathian thu leh Sakramen rawngbâwlnaah mawhphurtu a ni. Bial dangah chuan chûng Pastor hnate chu thil tûl bîkah Bialtu Pastor nên inbiak remnain a thawk thei chauh ang.

Minister tih tur pawimawh zualte chu - Pathian Thu hril te, Sakramen rawngbâwl te, ringtute tihchak te, inthlahdah chawh harh te, hrehawm tuar thlamuan te,

Krista taksa tihpuitlin te, a enkawlina hnuaia awm zawng zawng kan leh ngaihsak te leh kawng tinrênga Kohhran rorêlna dik tak ngaihtuah te a ni.

b. Minister atâna nemnghehna

Nemngheh tura buatsaih chu Minister atân nemngheh a nih hmain a nungchang te, a sakhaw nun te, Pastor nih a châk chhan te ngun taka thlir zet tur a ni a. Hêng thilah leh a zirlai a zawh dânah te Synod a lungawi tâwk chuan nemngheh tur a ni.

Dân zawhkim hnua inngaihna sual emaw, uirena sual emawa tlute erawh chu tu mah nemngheh tur a ni lo.

c. Nemngheh dân tur

Synod-a Minister nemngheh inkhâwm chu hetiang hian tih ni se a tha:-

- i) Nemngheh turte hming chhiar chhuah.
- ii) Nemngheh turte chu dân ang taka thlan an nih leh nih loh Moderator-in Synod a zâwt ang.
- iii) Nemngheh turte chu Thurin Sâwm atangin zawhna zawh a ni ang.
- iv) Nemngheh tur apiang chuan India Ram Presbyterian Kohhran Thurin Puanchhuahna leh Dânpuì te thinlung taka a pawm thu vântlâng hmaah a puang ang a, Kohhran Minister anga tih tur zawng zawng tih a inhuam thu a tiam tur a ni.

- v) Zawnhate chu zawh a niha, pawm tlàka chhân a nih hnuin, Moderator-in a nemngghet ang.
- vi) Moderator-in nemngghet tur lu chung a kut ngghatin, Synod hmingin he nemngghetna thu hi a puang ang a, chumi chhâng chuan mipui an ding ang:

“Lalpa Isua Krista, Kohhranho Lalber leh Lu ber hmingin leh, he Synod thuneihna hian, India Ram Presbyterian Kohhran Minister ni turin, Pathianin a remruat ang a kohna che apianga Chanchin Tha hril tur te, Lalpa Sakramen rawngbâwl tur te, Kohhranin i chung a rawngbâwl a pêk apiang che thawk tur tein kan nemngghet a che. Hêng hna atân hian Ama Thlarau chuan tikhat che rawh se, Amen.”

- vii) Nemngghetna tawngtai.
- viii) Tawngtai zawhah Moderator chuan nemngghet a mal malin an kut ding lam chelhin hetiang hian a sawi ang:

“He rawngbâwl hna hi chang ve turin inpâwl a kut ding lam kan hlân a che.”

Moderator hlui awm vete zawnzawng pawhin inpâwl a kut ding lam an hlân ve theuh ang.

- ix) Synod Moderator leh Secretary-in an hming an zia kana Nemngghetna Certificate chu Minister atâna nemngghet hnênah hlan a ni ang.

x) Minister pakhatin nemnghehte fuihna thu a sawi ang.

d. Pastor thawhna hmun ruat dân

Pastoral Committee-in Pastor thawhna hmun ruat leh sawn kual chungchâng a ngaihtuah ang a, a rawtna chu Synod pawm turin a thlen ang. Synod-in Pastoral Committee rawtna chu a pawm hnuin, Pastor thar chu a Biala dah nghet turin Minister pahnih emaw, Minister pakhat leh Upa pakhat emaw a tîr ang.

e. Bântîr dân

Eng hunah pawh, Minister-in nemngheh a nih chhan a tih duh loh chuan Minister a nihna ata bân a ni ang a, nemngheh a nihna pawh a bo ngêl hmiah ang.

4. DINHMUN NGAIA DAH LEH THEIH LOH

Kohhran puipa nghet tu mah, inngaihna sual vâng emaw, uirêna sual vâng emawa thununna tâwk tawh chu, a nihna ngaiah dah leh theih a ni lo vang.

BUNG VII

1. KALPHUNG TLANGPUI

He Dânpuiah hian Kohhranin rorêlna a kalpui dân tur chipchiar taka sawi lan a nih loh avângin Synod leh Kohhran rorêlna dangten a tûl dân ang zêlin Dânpuì kalh si lovin, thu an rêl ang.

2. DÂNPUÌ TIHDANGLAM DÂN

Dânpuì tihdanglam rêng rêng chu General Assembly tih tur a ni.

3. DÂNPUÌ HRILHFIAH CHUNGCHÂNG

Dânpuì hrilhfhiah thua General Assembly chauhvîn thu a nei a, a hrilhfhiahna chu thutâwp a ni.

**DÂN TÊ
(Bye-Laws)**

Dân tê chu Dân bua thute tihhlawhtlin nâna dân tênau siamte hi a ni a, Dânpuì chhûngah telh an ni ve lo. Hêng dânte hi a tûl angin Executive Committee-in a enawnin a tidanglam thei ang.

1. ADMINISTRATIVE SECRETARY-TE

General Assembly ni tin hna tha taka a kal theih nân Synod hrang hrang atanga ruat Administrative Secretary pathum an awm ang a, chûngte chu an hna avângin General Assembly Puipa an ni ang.

a. An thawh hun chhûng

Administrative Secretary-te tan hun chhûng chu kum li a ni ang a, term khat dang atân ruat nawn theih an ni ang.

b. Ruat dân

- i) Administrative Secretary atân hian General Assembly chhûnga Minister tu pawh, a hnuaia târ lan atanga teha tling chu ruat theih an ni:

- (a) Probationary Pastor atâna ruat ni atangin kum sâwm leh panga tal rawngbâwlâna thawk tawh.
- (b) Serampore College (University) emaw, kan pawm theih dang University/College emaw atanga B.D. degree nei chin.
- (c) A awmna Synod-ah emaw, General Assembly-ah emaw Executive Committee member lo ni tawh.
- ii) Executive Committee-in Synod zawng zawng hnênah thawktu tur rawt turin a sâwm ang.
- iii) Administrative Secretary-te chu Executive Committee-in a ruat thin ang a, a ruatnaah an thawh tawhna te, Synod dilpuina te a thlir ang a, a theih phawt chuan lungual thapna chauh ruat thin tur a ni.
- iv) Administrative Secretary tura a ruatte chu pawm turin General Assembly-ah a thlen tur a ni.
- v) Administrative Secretary-te chu a ruala ruat tur an ni lo. A tharin a hlui nêna kum hnih tal an thawh ho theih nân leh kalphung vawn nun zêl nân Administrative Secretary pakhat emaw pahnih emaw a thar lo luh rual hian an tâwp ve tur a ni.

c. Ruat nawn dân

- i) Working Committee-in Administrative Secretary term a tâwp hma kum khat hma lamah a tâwp tur chungchâng Executive Committee hnênah a hriattîr ang.

- ii) Administrative Secretary ruat nawn chungchâng chu Executive Committee thu a nì ang a. Ruat nawn a nih dân chuan kum li chhônga a thawh that leh that loh ngun taka thlir hnuah a lungawi chuan a ruat nawn ang.
- iii) Executive Committee chuan Administrative Secretary chu a ruat nawn dânah a awmna Synod a hriattîr ang a, term khat dang a thawh remtihsak turin a ngên ngêl bawh ang.
- iv) Executive Committee-in Administrative Secretary a ruat nawn thu chu General Assembly a hriattîr ang.

d. Administrative Secretary-te hna thawh dân kalhmang

Administrative Secretary-te chu General Assembly Office-ah an theihna zawng zawnga thawk tura beisei an ni. General Assembly remtihna lo chuan hna dang an thawk tel tur a ni lo. General Assembly hna tha taka a kal theih nân Administrative Secretary-te chu General Assembly House-ah chêng ngei tura beisei an ni.

e. Administrative Secretary-te hna thawh dân tur

Working Committee-in Administrative Secretary-te mawphurhna leh hna chanpual tur a rêlsak ang.

f. Sum lam changtu Administrative Secretary tih tur

Hêngahte hian sum lam changtu Administrative Secretary chuan mawh a phur ang:-

- i) Ni tina General Assembly sum che vêl enkawl.
- ii) Tangka vawngtu hnêna sum hman phalna pêk.
- iii) Tangka vawngtu nêna budget siam.
- iv) Kum tinin Chartered Accountant-te endik tura sum dinhmun ziaik fel.
- v) Sum chi hrang hrangte Register hrana thliar fel.
- vi) General Assembly leh Executive Committee hnêna sum dinhmun hriattîr.

g. Treasurer hna

- i) Thla thum dan zêlah vawi khat tal General Assembly sum uluk taka endik.
- ii) Tangka lama mawhphurtu Administrative Secretary nêna sum enkawl dun.

h. Bank-a hming ziaktu turte

Bank Account-ah Administrative Secretary-te leh Treasurer-in hming an ziaak dôn ang a, sum lâk chhuah dâwnin Treasurer hming ziaak a tel ngei tur a ni.

2. GENERAL ASSEMBLY WORKING COMMITTEE

General Assembly inrêlbâwlina leh ni tin hnate tluang taka a kal zêl theih nân mawh phur turin Working Committee a awm ang. Working Committee member-te chu: Moderator, Secretary (Sr.), Treasurer, Administrative Secretary-te leh Synod tin aiawh pakhat (Synod aiawh atân duhthusâmah chuan Synod Executive Secretary ni thei se a tha). Working Committee member tan hun chhông chu kum hnih a ni ang a, member pasarih an awmin ro an rêl thei ang. Working Committee hi Executive Committee hnuaia Sub-Committee a ni. Moderator chu Chairman a ni ang a, Office enkawltu Administrative Secretary chu Secretary a ni ang. A tûl dân ang zêlin, chawpchilh deuh pawhin rorêl turin an thu thin ang.

A thawh turte

- a. Executive Committee rorêlte tha taka bawhzui.
- b. Executive Committee-in bawhzui tura a pêk apiang bawhzui.

- c. Policy thil a nih chauh loh chuan, Executive Committee thut leh nghâk hman lo thu hmanhmawh apiang a ching fel ang.
- d. Executive Committee hnêna theh luh hmain Finance Officer-ten sum dinhmun leh budget estimate report an ruahman chu a en thin ang.
- e. Administrative Secretary-te hna tur a rêlsak ang.

3. SYNOD EXECUTIVE SECRETARY-TE

Synod inrêlbâwlâ leh ni tin hnate tluang taka a kal theih nân Synod tinin Executive Secretary a nei thei ang a, an nihna avângin Synod Puipate zîngah an tel ang. Executive Secretary-te chu kum thum zêl an tang ang a, ruat nawn zêl chungchâng chu Synod thu thu a ni ang.

.....